

# TUTÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU DISTRITÚ GÀLACIÁ

---

Té Păblú cādŭha-dé tutú quíhí<sup>n</sup> ndaha nchaa ñáyiú sàndáá iní ñáhá xii  
Xítóhó Jesucristú ndécú òistritú Gàlaciá

**1** <sup>1</sup>Te yúhú té Păblú ní tendaha ñaha Xítóhó Jesucristú, ndihí Dútú  
Ndiöxí véxi-í càhá<sup>n</sup>-í tnúhu-gá. Te òiu Yá Ndiöxí ní dándótó-gă Xítóhó  
Jesucristú Yaá ní xíhí ní cùu. Te càchí tnúhu-í xii-ndo sã ñà díú ñáyiú  
ñuyú-a ni tendaha ñaha xii-í véxi-í, te ni Yă Ndiöxí te ni Xítóhó Jesucristú  
ñá túú ní xăha<sup>n</sup>-gă xii ihí<sup>n</sup> ñáyiú quixí-yu cachí tnúhu-yu nàcuáa cada-í. <sup>2</sup>Te  
yúhú té Păblú cādŭha-í tutú-a ndihí nchaa dava-gá ñáyiú ndècu ichi Yá  
Ndiöxí ndécú ndihí-í iha cuèndá daquixi-í ndaha nchòhó ñáyiú sàndáá iní  
ñáhá xii Xítóhó Jesucristú ndécú òistritú Gàlaciá. <sup>3</sup>Te xicá<sup>n</sup> táhù-í núú  
Dútú Ndiöxí, ndihí núú Xítóhó Jesucristú sá òo na chindee chitúu ñaha-gá  
xii-ndo, te duca<sup>n</sup> ndè nduú-gá ná cádá te ío váha cuu iní-ndó cùndecu-ndo.  
<sup>4</sup>Te Xítóhó Jesucristú ní xíhí-gá sá cuèndá nchaa cuéchi nchoo cuè ñáyiú  
ndècu ñuyú-a. Te duca<sup>n</sup> ñí quide-gá, chi cuení-gá sá vă cùndècu-o ichi  
cuehé ichi duha. Te duca<sup>n</sup> ñí cuu, chi Dútú Ndiöxí duca<sup>n</sup> ñí cuení-gá  
cunduu. <sup>5</sup>Te ío chí ná ndàcá<sup>n</sup> táhù-ó núú Yă Ndiöxí cuèndá sá òo càhnu  
cuu-gá, te òiu-ni duca<sup>n</sup> càda-o ni caa ni quíhí<sup>n</sup>! Te duca<sup>n</sup> na cùnduu.

**Mee-ni tnúhu Xítóhó Jesucristú cúu-xí tnúhu sá càhá<sup>n</sup> nàcuáa naníhí  
táhú-ó**

<sup>6</sup>Te ío cùñúhu-í cúu chi ío ndihí ní dáñá-ndó òchi Yá Ndiöxí. Te Yaá-á<sup>n</sup>  
ñí càhá<sup>n</sup> ñáhá-gă xii-ndo, chi Xítóhó Jesucristú ío ní cundàhú iní ñáhá-gă  
ní quide váha ñaha-gă xii-ndo, te vitna dàcuaha tucu-ndo ingá tnúhu, te  
càchí-ndó sã xă<sup>n</sup> dàcácu nihnu ñaha-xi xii-ndo núú ùhú núú ndàhú. <sup>7</sup>Dico  
ñáhá, chi ñá túú-gă tnúhu sá dácácu nihnu ñaha xii-o núú ùhú núú ndàhú.  
Te òicó-ni sá òo ñáyiú véxi dàticá nuu ñahá-yu xii-ndo dānehé ñáhă-yu  
tnúhu sá dácuíta nihnu ñaha xii-ndo, chi tnúhu-á<sup>n</sup> ñà túú cùu-xi tnúhu  
Xítóhó Jesucristú. <sup>8</sup>Te yúhú càhá<sup>n</sup>-í tnúhu Xítóhó Jesucristú, dico núú òo  
ñáyiú véxi dānehé ñáhá xii-ndo ingá tnúhu sá ñà túú ní dānehé ñáhà-í  
xii-ndo, te nchòhó cachí-ndó sã ñáyiú-á<sup>n</sup> nacháhu-yu núú Yă Ndiöxí sá

dúcá<sup>n</sup> quidé-yu. Te cuèi yúhú, te núu na dàma-í tnúhu danèhé ñáhà-í xii-ndo, te ñiu-ni duca<sup>n</sup> cǎhá<sup>n</sup>-ndó sǎ nǎchǎhu-í núú-gǎ te núu duca<sup>n</sup> na càda-í. Àdi te núu ì<sup>n</sup> espíritú xínú cuèchi núú-gǎ véxi-xi cǎhá<sup>n</sup>-xi ìngá tnúhu sǎ ñà túú ní dǎnehé ñáhà-í xii-ndo nǎcuáa naníhí tǎhú-ndó ñá, te ñiu-ni duca<sup>n</sup> cǎhá<sup>n</sup>-ndó sǎ nǎchǎhu-xi núú Yǎ Ndiöxí te núu duca<sup>n</sup> na càda-xi. <sup>9</sup>Te ñiu-ni duha sa ní dǎnehé ñáhà-í xii-ndo sǎ ñuu véxi ñáyiú dǎnehé ñáhá ìngá tnúhu sǎ ñà túú ní dǎnehé ñáhà-í xii-ndo nǎcuáa naníhí tǎhú-ndó ñá, te cachí-ndó sǎ ñáyiú-á<sup>n</sup> nǎchǎhu-yu núú Yǎ Ndiöxí sǎ dúcá<sup>n</sup> quidé-yu, duha ní cachí-í xii-ndo.

<sup>10</sup>Te duha ndùu tnúhu cǎhá<sup>n</sup>-í chi nchòhó sa xíní-ndó sǎ yúhú cuení-í sǎ Yǎ Ndiöxí cǎhá<sup>n</sup>-gǎ sǎ quidé vǎha-í ndécù-í, te ñá díú sǎ ñáyiú ñuyíú-a cachí-yu sǎ quidé vǎha-í, àdi sǎ ìo cùdíí ìní-yu nchaa nǎcuáa quide-í ndécù-í. Te núu na càni iní-í cudíu-í núú ñáyiú ñuyíú-a, te ñá túú cùu-í tée xínu cuechi núú Xítóhó Jesucrìstú te núu duca<sup>n</sup> na càda-í.

#### Nǎcuáa ní cuu ní ngúíta té Pǎblú cǎhá<sup>n</sup>-dé tnúhu Yǎ Ndiöxí

<sup>11-12</sup>Te nchòhó ñáyiú ndècu ndíhi-í ichi Xítóhó Jesucrìstú cǎchí tnúhu-í xii-ndo sǎ tnúhu sǎ dǎnehé ñáhà-í xii-ndo nǎcuáa naníhí tǎhú-ndó cùu-xi tnúhu sǎ ñí cachí tnúhu mee Xítóhó Jesucrìstú xii-í, te ñá díú ì<sup>n</sup> ñáyiú ñuyíú-a ni cǎhu iní-yu tnúhu-á<sup>n</sup>, àdi danehé ñáhǎ-yu xii-í, chi mee Xítóhó Jesucrìstú ní dǎnehé ñáhá-gǎ.

<sup>13</sup>Te nchòhó sa ñíhí-ndó tnúhu nǎcuáa ní xóo cada-í cútnáhá nchìcú<sup>n</sup> nihnu-í nchaa nǎcuáa dàcuaha ñáyiú cùu ndi mee-í ñáyiú isràél ní cùu. Te dàvá-á<sup>n</sup> ìo ní xóo cuu úhú iní-í nchaa ñáyiú ndècu ichi Yǎ Ndiöxí, te nándi sǎ ñí xóo cada-í-yu, te ní cuení-í danàa-í-yu ni cùu. <sup>14</sup>Te yúhú ío-gǎ ní xóo quene cáva-í ní xóo dacuàha-í nchaa sǎ dacuàha ñáyiú cùu ndi mee-í dǎcúxí ñáyiú ì<sup>n</sup>-ni cuíà-í ndíhí-yu ni cùu, te ío-gǎ ní xóo cuení-í cada ndáá-í canchicú<sup>n</sup> nihnu-í nchaa nǎcuáa ní dǎnehé ñáhá cuè ñaní tnáhà-í ní xíndecu ndéé sanaha ni cùu. <sup>15</sup>Te ndéé cútnáhá vátá cǎcú-gǎ-í Yǎ Ndiöxí sa nèhe vǎha ñaha-gǎ xii-í cuèndá sǎ cǎhá<sup>n</sup>-í tnúhu-gǎ, núu xǎ<sup>n</sup> ní cǎhá<sup>n</sup> ñáhá-gǎ xii-í quidé-í chù<sup>n</sup>-gǎ vitna, te sǎ dúcá<sup>n</sup> ñí quide-gǎ te ío vǎha ní quide ñaha-gǎ xii-í. <sup>16</sup>Te òré ní cǎhá<sup>n</sup> ñáhá Yǎ Ndiöxí xii-í te ní cachí tnúhu-gǎ cuèndá Déhe-gǎ Xítóhó Jesucrìstú. Te duca<sup>n</sup> ñí quide Yǎ Ndiöxí cuèndá sǎ cuení-gǎ sǎ cǎñaha-í xii ñáyiú ñá túú cùu ñáyiú isràél cuèndá Yaá cúú Déhe-gǎ. Te cútnáhá ní cǎhá<sup>n</sup> ñáhá Yǎ Ndiöxí xii-í, te vǎ yóo ì<sup>n</sup> dǎi núú-xi ni ndècu tnúhu-í nǎcuáa cada-í. <sup>17</sup>Te ni ñà túú ní sǎhá<sup>n</sup>-í ñuu Jerusàlén nducu tnúhu-í núú cuè tée díhna nuu ñí tendaha Xítóhó Jesucrìstú cǎhá<sup>n</sup> tnúhu-gǎ ñuu nása cada-í, chi ndíhi-ni ní sǎhá<sup>n</sup>-í distritú Àrabiá ní xíndecu tnaa-í te dǎtnùní cuánuhú tucu-í ñuu Dàmascú.

18Te núú ùní cuíá sǎ ñí cǎhá<sup>n</sup> ñáhá Yǎ Ndiöxí xii-í, te ní sáhá<sup>n</sup> tucu-í ñuú Jerusàlén ní cǎhá<sup>n</sup> ndihi-í té Pèlú, te ní xíndecu-í ndihi-dé sáhú<sup>n</sup> nduu.

19Te tnàhá té Jàcobó ñaní Xítóhó Jesucristú ní cǎhá<sup>n</sup> ndihi-í. Te ñá túú ní xìní-í dava-gá cue téé ní tendaha Xítóhó Jesucristú cǎhá<sup>n</sup> tnúhu-gá. 20Te Yá Ndiöxí ndéhé ndii ndehe caxi-gá sá ncháá tnúhu tèe-í núú tütú-a sá cúú-xí-ndó cùu-xi ñí<sup>n</sup> sá ndàá.

21Te sátá ñí sáhá<sup>n</sup>-í ñuú Jerusàlén, te dàtnùní ní sáhá<sup>n</sup>-í distritú Sìriá, ndihi distritú Ciliciá. 22Te nchaa ñáyiú xíndecu ichi Xítóhó Jesucristú ndécú distritú Jùdeá ñá túú xìní ñáhǎ-yu xii-í ní cùu. 23Dico ní xóo níhǎ-yu tnúhu nchaa nàcuáa ní xóo cada-í, te ní cachí-yu: “Tée cùu úhú iní ñáhá xii nchaa nchoo ñáyiú ndècu ichi Xítóhó Jesucristú cǎhá<sup>n</sup>-dé tnúhu-gá núú ñáyiú cuendá quíndáá iní ñáhǎ-yu xii-gá, te diu-dé nándi sá quidé ñàha-dé, te cuíní-dé danàa ñàha-dé cuendá sá vǎ cóo-gǎ ñáyiú quíndáá iní ñáhá xii-gá ní cùu”, duha ní cachí-yu cuendá-í. 24Te ní ngúíta-yu ní cachí-yu sá ïo cǎhnu cuu Yá Ndiöxí cuendá sá ñà túú-gǎ quidé-í dàtná ní xóo cada-í.

**Té Pǎblú ní níhí tnáhá-dě ndihi dava-gá cue téé cǎhá<sup>n</sup> tnúhu Yá Ndiöxí**

**2** 1Te ní nútnahá úxícúmí cuíá sǎ ñí sáhá<sup>n</sup>-í ñuú Jerusàlén ní cǎhá<sup>n</sup> ndihi-í té Pèlú, te dàtnùní ndécà-í té Bèé ní sáhá<sup>n</sup>, te tnàhá té Títú ní sáhá<sup>n</sup> ndihi-ndí-dé. 2Te ní sáhá<sup>n</sup>-í chi mee Yǎ Ndiöxí ní cachí-gá sá quíhǎ<sup>n</sup>-í. Te yàcá<sup>n</sup> ní tacá mee-ni cuè téé cùnuu. Te ní xáha<sup>n</sup>-í xii-güedé nàcuáa ndùu tnúhu dǎnehé-í ñáyiú ñá túú cùu ñáyiú isràél cuendá naníhí tàhú-yu. Te duca<sup>n</sup> ñí quide-í cuendá cuíní-í quíni-güedé nàcuáa ndùu chiu<sup>n</sup> quide-í, chi nacuhá<sup>n</sup> cachí-güedé sá ñà túú nàndíhi-xi. 3Te té Títú té ndècu ndihi-í chi ñá díú tée isràél cúú-dě, dico ñá túú ní quide yica-güedé cuáha-güedé sèná ñii-dé. 4Te ñáyiú cǎchí sá ndécú ichi Xítóhó Jesucristú te ñá ndàá sá ndécú-yu ichi-gá, ñáyiú-á<sup>n</sup> ñí chitnahá ñáhǎ-yu xii-ndí cuendá cuíní-yu quíni-yu nása quide-ndí ndécú-ndí ichi Xítóhó Jesucristú. Te duca<sup>n</sup> ñí quidé-yu cuendá sá nchǎhú sa ní cácu nihnu-ndí ñá túú-gǎ quidé-ndí nchaa nàcuáa ní cǎhá<sup>n</sup> ndii Moisés. Te cuíní-yu sá núcuíta saa tucu-ndí cada-ndí nchaa nàcuáa ní cǎhá<sup>n</sup> ndii nucúndecu-ndí dàtná ní xíndecu-ndí cútnáhá vátá cácu nihnu-gá-ndí núú tnúhu-á<sup>n</sup> ni cùu. 5Te nchúhú ñá túú tnàhí ni dàña-ndí méé-ndí dandàhú ñáhǎ-yu xii-ndí. Te duca<sup>n</sup> ñí quide-ndí, chi cuíní-ndí sá ñà túú nǎgá tnúhu dácánuu ndihi tnúhu sá cǎhá<sup>n</sup> nàcuáa naníhí tàhú-ó ndècu ndihi-ndo.

6Te ni ñí<sup>n</sup> tnúhu sá vátá quíni-gá-í ñá túú ní cǎchí tnúhu cue téé cùnuu núú ñáyiú cada-í. Dico yúhú chi ñá túú ní quide cuendá-í ñuú cùnuu-güedé àdi ñá túú cùnuu-güedé, chi núú Yǎ Ndiöxí ñí<sup>n</sup>-ni cùu-o nchaa-o. 7Te ní cutnùní iní-güedé sá Yǎ Ndiöxí ní cachí-gá xii-í sá cǎhá<sup>n</sup>-í tnúhu-gá núú ñáyiú ñá túú cùu ñáyiú isràél dàtná ní quide-gá té Pèlú ní xáha<sup>n</sup>-gǎ

càhá<sup>n</sup>-dé tnúhu-gá núú ñáyiú isràél. <sup>8</sup>Te duca<sup>n</sup> ñi cutnùnì iní-güedé, chi diu-ni Yá Ndiöxí Yaa chindèe ñaha xii té Pèlú càhá<sup>n</sup>-dé tnúhu-gá núú ñáyiú isràél, diu-ni Yaa-á<sup>n</sup> chindèe ñaha-gá xii-í càhá<sup>n</sup>-í tnúhu-gá núú ñáyiú ñá túú cùu ñáyiú isràél.

<sup>9</sup>Te té Jàcobó, ndihi té Pèlú, ndihi té Juàá, cue tée ío cùnuu-gá ní cutnùnì iní-güedé sá Yá Ndiöxí ío chindee ñaha-gá xii-í quídè-í chiu<sup>n</sup>-gá. Te ío váha ní càhá<sup>n</sup> ndihi ñaha-güedě xii-í, ndihi té Bèé, te ní cuu ñi<sup>n</sup>nuu-ndí sá nchúhú quíhí<sup>n</sup>-ndí càhá<sup>n</sup>-ndí tnúhu Yá Ndiöxí núú nchàa ñáyiú ñá túú cùu ñáyiú isràél, te mee-güedě càhá<sup>n</sup>-güedé tnúhu-gá núú ñáyiú isràél. <sup>10</sup>Te ñi<sup>n</sup>-ni tnúhu ní càhá<sup>n</sup>-güedé dóho-ndí te ní cachí-güedé xii-ndí sá chindèe-ndí cue ñáyiú ndàhú, te sa duca<sup>n</sup> tnàhí sàni iní-ndí cada-ndí.

### **Té Pàblú càhá<sup>n</sup>-dé dóho té Pèlú ñuú Antiòquiá**

<sup>11</sup>Te cútnàhá ní sáhá<sup>n</sup> té Pèlú ñuú Antiòquiá yàcá<sup>n</sup> ní càhá<sup>n</sup>-í dóho-dé, chi quide-dé ñi<sup>n</sup> sá ñà túú tàú-dé cada-dé ní cùu. <sup>12</sup>Te quide váha-dé ní cùu chi xèxi-dé ndihi ñáyiú ñá túú cùu ñáyiú isràél, dico òré ní sáá ñi<sup>n</sup> úú ñáyiú cùndihi té Jàcobó, te òré-á<sup>n</sup> ñà túú-gá ní cuíní-dé caxi-dé ndihi ñáyiú-á<sup>n</sup>. Te duca<sup>n</sup> ñi<sup>n</sup> quide-dé chi ní yùhú-dé cue ñáyiú nchìcú<sup>n</sup> nihnu quide nchaa nacúáa ní càhá<sup>n</sup> ndíi Moisés sá vǎ càhá<sup>n</sup> váha-yu cuèndá-dé. <sup>13</sup>Te tnàhá dava-gá ñáyiú isràél xĩndecu ichi Yá Ndiöxí ñá túú quide váha-yu, chi quidé-yu dàtná quidé tǎ Pèlú ní cùu, te ndéé tnàhá té Bèé ní ngúíta-dé duca<sup>n</sup> quide-dé ní cùu. <sup>14</sup>Te òré ní xiní-í sá ñà túú quide-güedé ndihí-yu nàcuáa càhá<sup>n</sup> tnúhu Yá Ndiöxí, te núú nchàa ñáyiú ndècu ichi Yá Ndiöxí ní xáha<sup>n</sup>-í xii té Pèlú: “Yòhó cúú-n tǎe isràél, te ñá túú quide-n nchaa nacúáa quide ñáyiú isràél, chi quide-ni-n datná quidé nchàa ñáyiú ñá túú cùu ñáyiú isràél. Te núú duca<sup>n</sup> quide-n, ¿te ná cuèndá dánèhé-n ñáyiú ñá túú cùu ñáyiú isràél sá cádá-yu nchaa nàcuáa quide ñáyiú isràél?”, duha ní xáha<sup>n</sup>-í xii té Pèlú.

### **Ñi<sup>n</sup>-ni nàníhí tàhú-ó ndihi ñáyiú isràél nùu na quĩndáá iní-ó Xítohó Jesucristú ndihí-yu**

<sup>15</sup>Te yúhú ndihi té Pèlú cúú-ndí ñaní tnàhá ñáyiú isràél, te ñá túú ndècu-ndí ichi cuèhé ichi duha dàtná ndécú nchàa ñáyiú ñá túú cùu ñáyiú isràél. <sup>16</sup>Te xiní-ó sǎ vǎ cúndècu-gá cuéchi-o nùú Yá Ndiöxí te núu na quĩndáá iní-ó Xítohó Jesucristú, te ñá díú sǎ cáncícú<sup>n</sup> nihnu-o càda-o nchaa nacúáa ní càhá<sup>n</sup> ndíi Moisés. Te tnàhá dava nchúhú ñáyiú isràél sàndáá iní-ndí Xítohó Jesucristú, te xǎ<sup>n</sup> cútnùnì iní-ndí sá ñà túú-gǎ cuéchi-ndí ndécú nùú-gǎ, dico ñá díú sǎ ñi<sup>n</sup> cáncícú<sup>n</sup> nihnu-ndí ní quide-ndí nàcuáa ní càhá<sup>n</sup> ndíi Moisés, chi cuèndá sá sàndáá iní-ndí Xítohó

Jesucristú. Te vá yõo ìí<sup>n</sup> cachí-ó sã ñà túú ndècu cuéchi-xi núú Yã Ndiõxí cuèndá sá nchìcú<sup>n</sup> nihnú-yu nchaa nàcuáa ní cáhá<sup>n</sup> ndíi Moisés.

17Te núu cuìní-ó sã vã cùndècu cuéchi-o nũú Yã Ndiõxí cuèndá sá sàndáá iní-ó Xítóhó Jesucristú, te xíã<sup>n</sup> cútnùní iní-ó sã ñà túú quìde váha-o. iTe vá cúú tnahí cani iní-ó sã Xítóhó Jesucristú dánèhé ñáhá-gã xii-o sã vã cádá vãha-o cùndecu-o! 18Te yúhú càchí-í sá vã cáncìcú<sup>n</sup> nihnu-gá-ó nchàa nacuáa ní cáhá<sup>n</sup> ndíi Moisés, dico núu vitna càchí-í sá xíní ñùhu-xi cada-o nchaa nacuáa ní cáhá<sup>n</sup> ndíi ña, te ñá túú quìde váha-í núú Yã Ndiõxí te núu duca<sup>n</sup> na càda-í. 19Te yúhú duu<sup>n</sup> duu<sup>n</sup> ní cutnùní iní-í sá vã ndácù-í cada-í nchaa nàcuáa ní cáhá<sup>n</sup> ndíi Moisés nũu xíã<sup>n</sup> ní dáñà-í ñá túú-gã nchìcú<sup>n</sup> nihnu-í nchaa nàcuáa ní cáhá<sup>n</sup> ndíi cuèndá sá cuìní-í cundecu-í sá cúú-xí Yã Ndiõxí. 20Te Xítóhó Jesucristú ní xíhí-gá cuèndá-í, dico dàtná tnúhu sá tnahá-í ní xíhí ndìhi-gá, chi ñá cúú-gã cada-í nchaa nàcuáa sàni iní mèè-í, chi Xítóhó Jesucristú-nã ndécú ndìhi ñaha-gá xii-í táxí tnùní ñáhá-gã. Te vitna ndècu-í ñuyú-a, te ío sàndáá iní-í Xítóhó Jesucristú Déhe Yá Ndiõxí, te chindee ñaha-gá xii-í. Te ñu-ni Xítóhó Jesucristú ío cùu iní ñáhá-gã xii-í nũu ní xíhí-gá núú cùrúxí sá cuèndá-í. 21Te vitna ñá túú dàquee tñhù-í sá vãha ní quìde ñaha Yã Ndiõxí xii-í, chi núu ni ndàcu-o vá cùndècu cuéchi-o nũú Yã Ndiõxí cuèndá sá nchìcú<sup>n</sup> nihnu-o quìde-o nchaa nacuáa ní cáhá<sup>n</sup> ndíi Moisés ní cùu ña, te àú<sup>n</sup> ñá cuu ní xíhí Xítóhó Jesucristú ní cùu te núu duca<sup>n</sup>.

### Vá dáñá ndèé-ó quèndáá iní-ó tnũhu Xítóhó Jesucristú

**3** 1Te nchòhó ñáyíu distrítú Gàlaciá, ñáyíu sa xĩndecu ichi Xítóhó Jesucristú, ìná cuèndá ío ñíí iní-ndó ñã cuìní-ndó tnè-ndo nchaa tnúhu càhá<sup>n</sup>-gá?, ¿te yoo ní dádãhu ndodo iní ñáhá xii-ndo núu duca<sup>n</sup> quìde-ndo? Te ñaha-ndo sá ío váha ní dánèhé ñáhá-ndě xii-ndo nàcuáa ní cuu ní xíhí Xítóhó Jesucristú. 2Te vitna cáhá<sup>n</sup>-ndó nũu sá nchìcú<sup>n</sup> nihnu-ndo nchàa nacuáa ní cáhá<sup>n</sup> ndíi Moisés ní níhí-ndó Espíritú Yã Ndiõxí ndécú ndìhi-ndo, àdi sá ni sàndáá iní-ndó tnũhu Xítóhó Jesucristú sá ñí dánèhé ñáhá-ndě xii-ndo ñí níhí-ndó Espíritú-gá ndécú ndìhi-ndo. 3Te nchòhó ío ñíi ñíquí-ndó chi Espíritú Yã Ndiõxí tá quìde váha ñaha-xi xii-ndo cuáhá<sup>n</sup> ní cùu. ¿Te náa vitna mee-ñã-ndó cuìní-ndó càda-ndo nacuáa ta quìde ñaha Espíritú-gá cuáhá<sup>n</sup> xii-ndo ni cùu-á<sup>n</sup>? 4Te sàni ìí<sup>n</sup> sani úú iní-í cuèndá-ndó sã àú<sup>n</sup> ñá cuu nándi yáha-ndo ndècu-ndo ichi Yá Ndiõxí. 5Te xíní-ndó sã Yã Ndiõxí ní taxi-gá Espíritú-gá ní ngúndecu ndìhi-ndo, te ní quìde-gá sá vã yõo tnahí ndàcu cada núú-ndó ñí xíní-ndó. Te duca<sup>n</sup> ñí quìde-gá, chi ní sàndáá iní-ndó-gã, dico ñá díú cuèndá nchaa nàcuáa ní cachí ndíi Moisés cada ñáyíu duca<sup>n</sup> ñí quìde-gá.



<sup>6</sup>Te ndíi Àbrahám duca<sup>n</sup> ìo ní sándáá iní ndíi Yá Ndiöxí, núu xíã<sup>n</sup> ní cachí-gá sá ñí cudüu ndíi núú-gã sá dúcá<sup>n</sup> ñí quide ndíi. <sup>7</sup>Te cächí tnúhu ndáá-í xii-ndo sã ncháá ñáyüu sándáá iní ñáhá xii Yá Ndiöxí dàtná ní sándáá iní ñáhá ndíi Àbrahám xii-gá, ñáyüu-á<sup>n</sup> ìi<sup>n</sup>-ni cùú-yu ndíhi ndíi núú-gã. <sup>8</sup>Te núú tùtú Yá Ndiöxí ní ngódó tnùní tnúhu váha, tnúhu sá ñí xáha<sup>n</sup> Yá Ndiöxí xii ndíi Àbrahám, te duha ní xáha<sup>n</sup>-gã xii ndíi: “Nchaa ñáyüu nihíi ñuyúú cada váha-í-yu sá cuèndá-n”, duha ní xáha<sup>n</sup>-gã xii ndíi. Te sá dúcá<sup>n</sup> ñí ngódó tnùní núú tùtú Yá Ndiöxí ndéé dàvá-á<sup>n</sup>, te xíã<sup>n</sup> cútnùní sá sàà nduu, te cue ñáyüu ñá túú cùu ñáyüu isràél vá cúndècu-gá cuéchi-yu núú-gã te núu na quíndáá iní ñáhã-yu xii-gá. <sup>9</sup>Te xíã<sup>n</sup> núu nchaa ñáyüu sándáá iní ñáhá xii Yá Ndiöxí cada váha ñaha-gã xii-yu dàtná ní quide váha-gá ndíi Àbrahám, chi ndíi-á<sup>n</sup> duca<sup>n</sup> ñí sándáá iní ñáhá ndíi xii-gá.

<sup>10</sup>Te nchaa ñáyüu cuíní cada nchaa nàcuáa ní cáhá<sup>n</sup> ndíi Moisés cuèndá sá cuíní-yu sá vã cúndècu-gá cuéchi-yu núú Yá Ndiöxí, ñáyüu-á<sup>n</sup> dañá nihnu ñaha-gá xii-yu, chi vá ndácü-yu cadá-yu nàcuáa sàni iní-yu, te duca<sup>n</sup> càda-gá chi quèe ndáá-xi nàcuáa càhá<sup>n</sup>-xi núú tùtú-gá núú cächí-xi sá ncháá ñáyüu ñá túú quide nchaandi túhú nàcuáa ní cáhá<sup>n</sup> ndíi Moisés te dañá nihnu ñaha-gá xii-yu. <sup>11</sup>Te núu na cànchicú<sup>n</sup> nihnu-ni-o càda-o nacuáa ní cáhá<sup>n</sup> ndíi Moisés, te ñá túú vèdana chindee ñaha-xi xii-o nacuáa vá cúndècu-gá cuéchi-o núú Yá Ndiöxí. Te ndáá chi núú tùtú-gá cächí-xi sá ncháá ñáyüu sándáá iní ñáhá xii-gá, ñáyüu ñá túú-gã cuéchi-xi ndècu ío váha ndècú-yu núú-gã. <sup>12</sup>Te núu dìcò ío ñáyüu quide nchaandi túhú nàcuáa ní cáhá<sup>n</sup> ndíi Moisés ñá, te ñá túú xini ñuhu-xi quíndáá iní-yu tnúhu Xítohó Jesucrìstú, chi núú tùtú Yá Ndiöxí cächí-xi sá núu dìcò ío ñáyüu ndacu cada nchaa nàcuáa ní cáhá<sup>n</sup> ndíi Moisés ñá, te cundecu váha-yu núú Yá Ndiöxí.

<sup>13</sup>Te tnúhu ní chídó tnùní ndíi Moisés cächí-xi sá ìo ndècu cuéchi-o núú Yá Ndiöxí cuèndá sá ñã ndácú-ó càda-o nchaa nacuáa ní cáhá<sup>n</sup> ndíi, te cuèndá xíã<sup>n</sup> tá dàña nihnu ñaha-gá xii-o cuáhã<sup>n</sup>. Dico Xítohó Jesucrìstú ní xido-gá nchaa cuéchi-o cuèndá sá vã dáñá nihnu ñaha-gá Yá Ndiöxí xii-o. Te cächí-xi núú tùtú Yá Ndiöxí: “Ì<sup>n</sup> téé na càta caa-güedé ìi<sup>n</sup> yutnu, te téé-á<sup>n</sup> cúú-dě téé dàña nihnu ñaha Yá Ndiöxí”, duha cächí-xi núú tùtú-gá. <sup>14</sup>Te duca<sup>n</sup> ñí yáha Xítohó Jesucrìstú, chi cuíní Yá Ndiöxí sá ndùu táhú nchaa ñáyüu ñá túú cùu ñáyüu isràél cundecu váha-yu dàtná ní nduu táhú ndíi Àbrahám ndécú vãha ndíi. Te duca<sup>n</sup> ñí yáha-gá cuèndá nchaa nchoo ñáyüu sándáá iní ñáhá xii-gá ngúndecu ndíhi-o Espíritú Yá Ndiöxí sá ñí cachí méé-gã taxi-gá.

**Nàcuáa ní cachí Yă Ndiöxí cada-gá**

15Te nchòhó cue ñáyiú ndècu ndihi-í ichi Yă Ndiöxí na cächí tnúhu-í xii-ndo nàcuáa quide cue ñáyiú ñuyíú-a cuendá tecú tnùní-gá-ndó nàcuáa quide Yă Ndiöxí. Chi ñáyiú-á<sup>n</sup> òré cuíní-yu cadá-yu ì<sup>n</sup> sá cádă-yu, te díhna-gá ndátnùhu-yu te òré cúú ì<sup>n</sup>nuú-yu, te sáha firmá-yu ì<sup>n</sup> tutú te tutú-á<sup>n</sup> vă yöö ì<sup>n</sup> ndacu cáhá<sup>n</sup> sá vă nándĭhi-gá-xi, te ni vă yöö-gá ndacu nágá tnúhu chido tnùní núú-xí. 16Te duca<sup>n</sup> ñí quide Yă Ndiöxí ndihi ndíi Àbrahám, chi ní xáha<sup>n</sup>-gă xii ndíi nàcuáa cada-gá, te tnúhu-á<sup>n</sup> cúú-xí cuendá méé ndíi ndihi cuendá ì<sup>n</sup> ñaní tnáhá ndíi cundecu ñuyíú-a ndéé cuèè-gá. Te núú tütú-gá cächí-xi sá tnùhu-á<sup>n</sup> cúú-xí cuendá ì<sup>n</sup>-ni ñaní tnáhá ndíi te ñá díú cuendá nchaá-yu. Te ñaní tnáhá ndíi téé cùu cuendá tnúhu-á<sup>n</sup> cúú Xĭtohó Jesucrìstú. 17Te na cächí tnúhu-í xii-ndo să Yă Ndiöxí ní quide ndáá duu<sup>n</sup>-gá ndihi ndíi Àbrahám nàcuáa cada-gá. Te sa ní cuu cúmí ciendú ócó úxí cuíá să dúcá<sup>n</sup> ñí xáha<sup>n</sup> Yă Ndiöxí xii ndíi Àbrahám, te dătnùní ní xáha<sup>n</sup>-gă xii ndíi Moisés chido tnùní ndíi nàcuáa cada ñáyiú, te nchaá tnúhu ní chídó tnùní ndíi Moisés ñá túú dàquee tĭhú-xi tnúhu sá ñí xáha<sup>n</sup> Yă Ndiöxí xii ndíi Àbrahám nàcuáa cada-gá. 18Te núú dìcò cuendá nchaá tnúhu sá ñí chídó tnùní ndíi Moisés ní nánihí tàhú-ó ñá, te ñá túú-gă xíní ñùhu-xi cada cuendá-ó tnùhu ní xáha<sup>n</sup> Yă Ndiöxí xii ndíi Àbrahám cada-gá ní cùu te núú duca<sup>n</sup>. Te ndíi-á<sup>n</sup> ñí naníhí tàhú ndíi chi duca<sup>n</sup> ñí cachí Yă Ndiöxí cada ñaha-gă xii ndíi.

19Te nchaá tnúhu ní cáhá<sup>n</sup> ndíi Moisés ní ngódó núú-xí nchìcú<sup>n</sup> nihnu ñáyiú cuendá duca<sup>n</sup> cùtnuní iní-yu sá ndécú cuèchi-yu, te nchìcú<sup>n</sup> nihnu-ní-yu ndéé ní sáá nduu ñí quexìo Yaá cúú ñaní tnáhá ndíi Àbrahám, chi Yaá-á<sup>n</sup> duca<sup>n</sup> ñí xáha<sup>n</sup> Yă Ndiöxí quixi-gá cada váha-gá nchaá ñáyiú. Te nchaá tnúhu ní chídó tnùní ndíi Moisés, chi Yă Ndiöxí ní tendaha-gă cue espíritú xínú cuèchi núú-gă ní sáhá<sup>n</sup>-xi ní xítñùhu ñaha-xi xii ndíi nàcuáa danèhé ndíi ñáyiú. 20Te Yă Ndiöxí ñá túú ní cǎhá<sup>n</sup>-gá núú méé ñáyiú, chi ndíi Moisés ní cáhá<sup>n</sup> ndíi yuhu-gá núú-yu, dico cútnàhá ní cáhá<sup>n</sup> ndihi-gá ndíi Àbrahám chi núú méé nùú ì<sup>n</sup> ndíi ndihi-gá ní xáha<sup>n</sup>-gă xii ndíi nàcuáa cada-gá.

**Nàcuáa ndùu nchaá tnúhu ní chídó tnùní ndíi Moisés**

21Te nchaá nàcuáa ní chídó tnùní ndíi Moisés, ndihi nchaá nàcuáa ní xáha<sup>n</sup> Yă Ndiöxí xii ndíi Àbrahám cada-gá, ñá túú dàquee tĭhú tnáhá-xí. Te núú dìcò nánihí tàhú ñáyiú nchìcú<sup>n</sup> nihnu nchaá nàcuáa ní cáhá<sup>n</sup> ndíi Moisés ñá te cudìú-yu núú-gă cuendá-ni sá nchìcú<sup>n</sup> nihnú-yu nchaá nàcuáa ní cáhá<sup>n</sup> ndíi ni cùu. 22Te núú tütú Yă Ndiöxí cächí-xi: “Nchaá nchòhó ñáyiú ndècu ñuyíú ndécú cuèchi-ndo”, duha cächí-xi. Te duca<sup>n</sup> cǎhá<sup>n</sup>-xi

cuèndá quíndáá iní-ó Xítohó Jesucrìstú, te naníhí tàhú-ó chi duca<sup>n</sup> nĩ cachí Yă Ndiöxí cada-gá.

<sup>23</sup>Te cútnàhá vátá cúndècu ndihi-gá-ó tnũhu Xítohó Jesucrìstú, te nchìcú<sup>n</sup> nihnu-o nchàa nacuáa ní cáhá<sup>n</sup> ndíi Moisés, te ní cutnùnì iní-ó sã ïo ndècu cuéchi-o ni cùu. Te duca<sup>n</sup>-ni nchìcú<sup>n</sup> nihnu-o ndèé ní sáá nduu nĩ quexìo Xítohó Jesucrìstú ñuyíú-a, te ní sándáá iní-ó-gă. <sup>24</sup>Te nchaa tnũhu sá nĩ chídó tnùnì ndíi Moisés ní sanu ichi ñaha-xi xii-o nacuáa cada-o cùndecu-o, te duca<sup>n</sup>-ni sànu ichi ñaha-xi xii-o ndéé ní sáá nduu ní quexìo Xítohó Jesucrìstú ñuyíú-a. Te duca<sup>n</sup> nĩ cuu cuèndá quíndáá iní-ó-gă, te vá cúndècu-gá cuéchi-o nũú Yă Ndiöxí. <sup>25</sup>Te vitna ní ngúndecu ndihi-o tnũhu Xítohó Jesucrìstú, te ñá túú-gă xínì ñũhu-xi canu ichi ñaha nchaa tnũhu ní chídó tnùnì ndíi Moisés.

<sup>26</sup>Te vitna tnàhá nchaa nchòhó cúú-ndó dèhe Yă Ndiöxí, chi ní sándáá iní-ndó Xítohó Jesucrìstú. <sup>27</sup>Te nchòhó ní sandute-ndo dàtná cächí-gá, te ndècu-ndo ndihi-gá, te quide-ndo nchaa nacuáa ní cáhá<sup>n</sup>-gá ndécú-ndó, te ío ndècu yĩñuhu-ndo núú Yă Ndiöxí dàtná ndécú yĩñuhu mee Xítohó Jesucrìstú. <sup>28</sup>Te vitna ì<sup>n</sup>-ni cùu-o nchaa-o ndecu-o ndihi Xítohó Jesucrìstú cuèi cùu-o ñáyiu isràél àdi ñá túú cùu-o, te cuèi cùu-o ñáyiu ñá túú tnàhí dàñá quee núú chíú<sup>n</sup> pàtróó<sup>n</sup>-xi àdi cuu-o ñáyiu dàñá queé nũú chíú<sup>n</sup> pàtróó<sup>n</sup>-xi, te cuèi tée te cuèi ñadìhí ì<sup>n</sup>-ni cùu-o nchaa-o ndecu-o ndihi Xítohó Jesucrìstú. <sup>29</sup>Te nchòhó ndécú ndihi-ndo Xítohó Jesucrìstú, te cùu-ndo datná cue ñanì tnàhá ndíi Àbrahám, chi ní nduu táhú-ndó cùndecu váha-ndo nũú Yă Ndiöxí dàtná ní nduu táhú ndíi-á<sup>n</sup> ndécú vâha ndíi núú-gă, te duca<sup>n</sup> chi mee-gă duca<sup>n</sup> nĩ cachí-gá cunduu.

**4** <sup>1</sup>Te nchòhó xínì-ndó sã ì<sup>n</sup> té lĩhli chi vátá năgá cuãñaha tătá-dě cuu cuèndá-dé chi lĩhli-dé, te ì<sup>n</sup>-ni cùu-dé ndihi tée xĩnu cuechi, dico na sáá nduu cuèhnu-dé, te nduu táhú-dě nchaa sá ndécú ndíi tătá-dě. <sup>2</sup>Te xító-yu té lĩhli-á<sup>n</sup> sáhnú-dě ndéé sáá nduu nĩ cachí tătá-dě sá cuãñaha-dě sá ndúú táhú-dě. <sup>3</sup>Te duca<sup>n</sup> sãtnahá-xi cùu nchoo, chi nchìcú<sup>n</sup> nihnu-o nchàa nacuáa ní cáhá<sup>n</sup> cue tée ní xĩndecu ndéé sanaha ni cùu. <sup>4</sup>Te ní sáá nduu nĩ quide Yă Ndiöxí dàtná ní cachí-gá, te ní tendaha-gă Déhe-gá Xítohó Jesucrìstú ní quixi-gá ñuyíú-a, ní dácácú ñaha ì<sup>n</sup> ñadìhí te ní cuu-gá ñáyiu, te ní quide-gá nchaa nàcuáa ní cáhá<sup>n</sup> ndíi Moisés. <sup>5</sup>Te duca<sup>n</sup> nĩ tendaha Yă Ndiöxí Déhe-gá cuèndá sá vă cãchìcú<sup>n</sup> nihnu-gá-ó nchàa nacuáa ní chídó tnùnì ndíi Moisés cuèndá duca<sup>n</sup> te cuu-o dèhe Yă Ndiöxí.

<sup>6</sup>Te Yă Ndiöxí ní taxi-gá Espíritú Déhe-gá Xítohó Jesucrìstú ndécú ndíi-ndo chi cùu-ndo déhe-gá, te Espíritú-á<sup>n</sup> chĩndèe ñaha-xi xii-ndo te cächí-ndó: “Yòhó Dútú Ndiöxí cúú-n Tătá mée-ndĩ”, duha cächí-ndó. <sup>7</sup>Te xíã<sup>n</sup> cútnùnì iní-ndó sã cúú-ndó dèhe Yă Ndiöxí vitna, te ñá túú-gă cúú-ndó dàtná cue ñáyiu ñá túú tnàhí dàñá quee núú chíú<sup>n</sup> pàtróó<sup>n</sup>-xi. Te sá dúcá<sup>n</sup>



cùu-ndo déhe-gá, te Xítohó Jesucrìstú taxi-gá nchaa sá vâha ní cachí Yă Ndiöxí nduu táhú-ndó.

**Té Păblú ío sàni iní-dé cuendá nchaa ñáyi  
ndècu ichi Xítohó Jesucrìstú**

**8**Te cútnàhá vátá quìndáá-gá iní-ndó tnùhu Yă Ndiöxí ní xinu cuechi-ndo nùú nchàa sá cächí-yu cùu ndiöxí te ñá ndàá sá ndiöxí cúú-xí. **9**Te vitna nchòhó càhá<sup>n</sup> ndìhi-ndo Yă Ndiöxí, te mee-gă xìní ñáhá-gă xii-ndo, te ñá túú ndùu váha-xi nanchòcáva iní-ndó càda tucu-ndo nacuáa ní xóo cada-ndo dǐhna, chi nchaa xǐá<sup>n</sup> ñá túú vèdana nàndíhi-xi. **10**Te nchòhó cànehe íi-ni-ndo ndùu cachí-ndó íi, te diu-ni duca<sup>n</sup> quide-ndo dava yoó ndìhi dava cuíá, te ndi tnahá nduu sàcáo vico diu-ni duca<sup>n</sup> quide-ndo cànehe íi-ndó ndùu-á<sup>n</sup>. **11**Te ío sàni iní-í cuendá-ndó, chi na cuáhá<sup>n</sup> àú<sup>n</sup> nă cuu ní dánèhé ñáhà-í xii-ndo tnùhu Yă Ndiöxí.

**12**Te càhá<sup>n</sup> ndàhú-í nùú nchòhó ñáyi ndècu ndìhi-í ichi Xítohó Jesucrìstú sá cáda-ndó dàtná quídè-í ñá túú nchìcú<sup>n</sup> nihnu-í nchaa tnúhu ní cáhá<sup>n</sup> ndíi Moisés, chi yúhú quídè-í vitna dàtná ní quide nchòhó ñá túú ní cǎnchicú<sup>n</sup> nihnu-ndo nàcuáa ní cáhá<sup>n</sup> ndíi. Te cútnàhá ní xindecu ndìhi ñaha-í xii-ndo nǐ quide váha ñaha-ndo xii-í. **13**Te sa nàha-ndo sá cǔtnàhá ní cáhá<sup>n</sup>-í tnúhu Xítohó Jesucrìstú nùú-ndó ndèe dǐhna ní cuhú-í, nùu xǐá<sup>n</sup> ní xindecu ndìhi ñaha-í xii-ndo nǐ cáhá<sup>n</sup>-í tnúhu-gá nùú-ndó. **14**Te cuéhé sá nǐ tnahá-í-á<sup>n</sup> cúú-xí ìi<sup>n</sup> cuéhé sá vă yóo tnàhí cundee ìni-xi cundecu ndìhi ñaha xii-í ní cùu, dico nchòhó chi ío váha ní cáhá<sup>n</sup> ndìhi ñaha-ndo xii-í, te ñá túú ní sàni cuehé ní sàni duha iní-ndó cuendá-í, te ní cáhá<sup>n</sup> ndìhi ñaha-ndo xii-í dàtná tnúhu sá yǔhú cúú-í ìi<sup>n</sup> espíritú xínú cuèchi nùú Yă Ndiöxí àdi datná méé Xítohó Jesucrìstú. **15**¿Te ná ní tnahá-ndó nùu ñá túú-gă sání vâha iní-ndó cuendá-í dàtná ní xóo cada-ndo ndèe dǐhna ío váha ní xóo cani iní-ndó cuendá-í? Te na cächí tnúhu ndáá-í xii-ndo sá ìo ní cuu iní ñáhá-ndó xii-í cútnàhá ní xindecu ndìhi ñaha-í xii-ndo, te nàndi sá ndécú ndìhi-ndo taxi-ndo xii-í ní cùu, te nùu dícó sá cúú te ndéé tǐnùu-ndo tava-ndo te taxi-ndo xii-í ní cùu. **16**¿Te náa cùu úhú iní ñáhá-ndó xii-í vitna cuendá sá càhá<sup>n</sup>-í tnúhu ndáá tnúhu Yă Ndiöxí nùú-ndó-ă<sup>n</sup>?

**17**Te ìo ñáyi ío váha càhá<sup>n</sup> ndìhi ñaha xii-ndo, dico ñáyi-á<sup>n</sup> ñúhú cuéhé iní-yu, chi cuíní-yu sá vă cúú-gă cáhá<sup>n</sup> ndìhi tnàha-o, chi mee-nă-yu cundecu ndìhi-ndo cuíní-yu. **18**Te váha quide ñáyi càhá<sup>n</sup> ndìhi ñaha xii-ndo ndìhi tnúhu yǐñùhu, te nùu cuíní-yu cadá-yu ìi<sup>n</sup> sá vâha sá cúú-xí-ndó. Te duca<sup>n</sup>-ni na càdá-yu cuèi òré ñá túú ndècu ndìhi ñaha-í xii-ndo. **19**Te nchòhó ñáyi ní sanu ichi-í ichi Xítohó Jesucrìstú cächí tnúhu-í xii-ndo sá quídé-xí ìni-í dàtná quídé-xí ìni ìi<sup>n</sup> ñadìhí ñaha sa ní

tnahá òré cacu déhe-xi, te duca<sup>n</sup> quìde-xi iní-í, chi ío vài sani iní-í cuendá-ndó dàtná ní xóo cada-í ndéé díhna, te duca<sup>n</sup>-ni càda-í ndéé ná sàà nduu càda-ndo nchaa nacuáa càhá<sup>n</sup> Xítóhó Jesucristú. **20**Te ío váha cada-xi te núu dicó tnavíí sa ndècu ndíhi ñaha-í xii-ndo cuendá cáhá<sup>n</sup>-í núu-ndó nàcuáa cada-ndo, te ñá cútnùní iní-í nása cada-í cuendá-ndó!

### Cuendá ndíi Àgár ndíhi ndíi Sărá

**21**Te nchòhó ñáyiú cuení canchicú<sup>n</sup> nihnu nchaa tnúhu ní cáhá<sup>n</sup> ndíi Moisés, ìnáa ñá túú tècú tnùní-ndó nàcuáa càhá<sup>n</sup>-xi tnúhu ní chídó tnùní ndíi? **22**Chi càchí tnúhu ní chídó tnùní ndíi-á<sup>n</sup> să ndíi Àbrahám ní xíndecu úú déhe ducu<sup>n</sup> ndíi, te ì<sup>n</sup>-dé ní cuu déhe ndíi ndíhi ñadìhí mée ndíi ndíi Sărá, te ìngá-dé ní cuu-dé déhe ndíi ndíhi ì<sup>n</sup> ndíi ní xinu cuechi nŷŷ-yu ní xínani Àgár. **23**Te sá dúcá<sup>n</sup> ñí cacu déhe ndíi Sărá, chi mee Yă Ndiöxí ní cundàhú iní ñáhá-gă xii-a<sup>n</sup>, chi duca<sup>n</sup> ñí cachí-gá cada-gá. Dico ndíi ní xinu cuechi-ă<sup>n</sup> chi duca<sup>n</sup> tnàhí ní nduu táhú ndíi-á<sup>n</sup> să cóó dèhe ndíi. **24**Te na càchí tnúhu-í xii-ndo ñă cúú să nánèhé ndí ndúú cue ndíi òhí-á<sup>n</sup>. Te úú xito ní cáhá<sup>n</sup> Yă Ndiöxí nàcuáa cada-gá, te ì<sup>n</sup> ndíi-á<sup>n</sup> nánèhé ndíi nàcuáa ní cáhá<sup>n</sup> Yă Ndiöxí xito díhna nuu, te ìngá tucu ndíi-á<sup>n</sup> nánèhé ndíi nàcuáa ní cáhá<sup>n</sup> tucu-gá xito cùu úú. Te ndíi Àgár-á<sup>n</sup> nánèhé ndíi nàcuáa ní xáha<sup>n</sup> Yă Ndiöxí xii ndíi Moisés yucu Sinái cada ñáyiú, te nchaa ñáyiú nchìcú<sup>n</sup> nihnu nchaa tnúhu-á<sup>n</sup> cúŷ-yu dàtná déhe ndíi Àgár téé ní xinu cuechi, chi téé-á<sup>n</sup> ñà túú tnàhí ni dàñá-dé quee-dé núú chíú<sup>n</sup> pàtró<sup>n</sup>-dĕ, te duca<sup>n</sup> sãtnahá-xi cùú-yu chi nchìcú<sup>n</sup> nihnú-yu nchaa nàcuáa ní xáha<sup>n</sup> Yă Ndiöxí xii ndíi Moisés. **25**Te tnúhu Àgár quéé-xi: Yucu Sinái, te yucu-á<sup>n</sup> yíndèhu-xi nació<sup>n</sup> Àrabiá. Te ndíi Àgár-á<sup>n</sup> nánèhé tucu ndíi cue ñáyiú ndècu ñúú Jerusàlén, chi ñáyiú-á<sup>n</sup> ndécú-ñí-yu dàtná ní xíndecu ndíi Àgár ndíhi déhe ndíi, chi cue ndíi-á<sup>n</sup> ñí cuu cue ndíi ñáyiú ñá túú tnàhí ni dàñá quee núú chíú<sup>n</sup> pàtró<sup>n</sup>-xi, te duca<sup>n</sup> sãtnahá-xi cùu ñáyiú-á<sup>n</sup> chi nchìcú<sup>n</sup> nihnu-ní-yu nchaa nàcuáa ní cáhá<sup>n</sup> ndíi Moisés. **26**Dico nchoo ñí nduu táhú-ó cùndecu-o ñúú Jerusàlén sáá nŷŷ ndécú Yă Ndiöxí, te vitna chi ñá túú-gă nchìcú<sup>n</sup> nihnu-o nchàa nacuáa ní cáhá<sup>n</sup> ndíi Moisés. **27**Te duha càhá<sup>n</sup>-í, chi núú tütú Yă Ndiöxí càchí-xi:

Yòhó ñaha ní nduu táhú vă cóó dèhe-xi ni cùu, vitna cana saa-n să cúdíí ìní-n cuèi vátá quíní-gá-n ñăsa càcu ì<sup>n</sup> landú.

Te cuèi ní cuu táhú-n să vă cóó dèhe-n ni cùu dico ío-gá titní déhe-n còo dacúxí xíchí ñí cuu táhú tnàhí sá cóó dèhe-xi.

Duha càchí-xi núú tütú-gá. **28**Te nchoo cuè ñáyiú ndècu ichi Xítóhó Jesucristú vitna cùu-o datná ndíi Isàác, chi ndíi-á<sup>n</sup> ñí cacu ndíi, chi mee Yă Ndiöxí ní cachí-gá sá cacú ndíi. Te duca<sup>n</sup> sãtnahá-xi cùu nchoo chi ní nduu-o dèhe-gá vitna chi duca<sup>n</sup> ñí cachí tucu-gá cunduu. **29**Te déhe ndíi

Àgár ní nduu táhú tnàhí ndíi sá cáciu ndíi ñuyíú-a, te ndíi-á<sup>n</sup> ñí cuu úhú iní ndíi ndíi Isàác, te ndíi Isàác-á<sup>n</sup> chi Espíritú Yă Ndiöxí ní quide ní cacu ndíi. Te duca<sup>n</sup> sãtnahá-xi cùu vitna, chi nchaa nchoo ñăyiu ndècu ndíhi Espíritú Yă Ndiöxí cúú úhú iní ñáhá ñăyiu xii-o. <sup>30</sup>Te núú tütú Yă Ndiöxí cächí-xi: “Chí nácuí<sup>n</sup> xíchí xínú cuèchi ndíhi déhe-xi na nùhú-yu, chi déhe xíchí xínú cuèchi-á<sup>n</sup> ñà túú nă níhí-dě nduu táhú-dě, chi mee-ni déhe ñaha ndècu vehe-xi nduu táhú-dě sá cuãñaha tãtá-dě”, duha cächí-xi núú tütú-gá. <sup>31</sup>Te nchoo cuè ñăyiu ndècu ichi Xítóhó Jesucrìstú ñá túú-gá cúú-ó dàtná cúú dèhe ndíi ní xinu cuechi-ă<sup>n</sup>, chi ní cuu-o vitna datná cúú ndíi ní nduu táhú nchaa sá ñí sãñaha tãtá-xi-á<sup>n</sup>. Te duca<sup>n</sup> ñí cuu, chi Yá Ndiöxí ní dácacu ñaha-gă xii-o cuëndá sá vă cãchicú<sup>n</sup> nihnu-gá-ó nchaa nacúáa ní cáhá<sup>n</sup> ndíi Moisés.

### Canchicú<sup>n</sup> nihnu-ni-o ìchi Xítóhó Jesucrìstú

**5** <sup>1</sup>Te Xítóhó Jesucrìstú ní quide-gá nàcuáa vă cání iní-ó sã nánihí tãhú-ó te núú na cãchicú<sup>n</sup> nihnu-o nàcuáa ní cáhá<sup>n</sup> ndíi Moisés, te ñiu-ni duca<sup>n</sup> cãni iní-ó cùndecu-o te vă ngõo cãni iní-ó sã nánihí tãhú-ó te núú na cãchicú<sup>n</sup> nihnu-o càda-o nacúáa ní cáhá<sup>n</sup> ndíi, chi núú duca<sup>n</sup> na càda-o te ío dandòho-o mee-o datná ní xóo ndoho-o cùtnàhá vátá cùndècu-gá-ó ìchi-a.

<sup>2</sup>Te yúhú té Păblú cuiní-í sá cùndedóho-ndo ì<sup>n</sup> tnúhu na càhá<sup>n</sup>-í-a. Te núú nchòhó cuáha-ndo sèñá ñii-ndo cuëndá sá sàndáá iní-ndó nàcuáa ní cachí ndíi Moisés cada-ndo, te núú duca<sup>n</sup> na càda-ndo ña, te àú<sup>n</sup> nă cuu ndècu-ndo ichi Xítóhó Jesucrìstú te núú duca<sup>n</sup>. <sup>3</sup>Te dàtná ní cachí-í xii-ndo, te ñiu-ni duca<sup>n</sup> càhá<sup>n</sup> tucu-í vitna sá nùu ndèda-ni càa ì<sup>n</sup> tée na cuãha-dé sèñá ñii-dé, te xini ñuhu-xi sá dàcuití tãú-dé cada-dé nchaa nàcuáa ní cáhá<sup>n</sup> ndíi Moisés. <sup>4</sup>Te nchaa nchòhó ñăyiu sàni iní sá ñà túú-gă cuèchi-xi ndècu núú Yă Ndiöxí cuëndá sá nchicú<sup>n</sup> nihnu-ndo nchaa nacúáa ní cáhá<sup>n</sup> ndíi Moisés, ñá túú-gă ndécú-ndó ndíhi Xítóhó Jesucrìstú, te ni Yă Ndiöxí ñá túú-gă cùndàhú iní ñáhá-gă xii-ndo càda váha ñaha-gă. <sup>5</sup>Dico nchaa nchoo ñăyiu sàndáá iní ñáhá xii-gá cùñiu-o núú-gă, chi chindee ñaha Espíritú-gá xii-o, te ndètu cahnu-ná-ó sàá nduu cùñaha nùú Yă Ndiöxí xii-o sã cùñiu-o núú-gă. <sup>6</sup>Te nchoo cuè ñăyiu ndècu ndíhi Xítóhó Jesucrìstú ì<sup>n</sup>-ni quide-xi cuéi na cuãha-o sèñá ñii-o àdi vă cuãha-o, chi ñá túú chindee ñaha-xi xii-o nacúáa cundecu váha-o ndíhi-gá. Te ì<sup>n</sup>dii díi-ni sá xini ñuhu-xi quindáá iní-ó Xítóhó Jesucrìstú, te núú duca<sup>n</sup> na càda-o te cuu iní-ó cuè tnaha ñăyiu-o.

<sup>7</sup>Te nchòhó ío váha quide-ndo ndecu-ndo ichi Yá Ndiöxí ní cùu, te vitna cùñúhu-í sá ñà túú-gă sàndáá váha iní-ndó tnúhu-gá, te duca<sup>n</sup> quide-ndo chi ndècu ñăyiu sànu ichi ñaha xii-ndo ìngá ichi. <sup>8</sup>Te ñá díú Yă Ndiöxí Yaá

ní cáhá<sup>n</sup> ñáhá xii-ndo duca<sup>n</sup> ni cachí-gá cada-ndo sã vã quindáá-gá iní-ndó tnúhu-gá. <sup>9</sup>Te nchòhó xini-ndó sã nõu luha levadùrá ná quihu yuchi te dàndaa-xi. Duca<sup>n</sup> sãtnahá-xi cùu ñáyiu dándahú ñáhá xii-ndo, chi cuiní-yu dàcuíta nihnu ñáhá-yu xii-ndo nchàa-ndo. <sup>10</sup>Te yúhú cútnùní ndáá iní-í sá Xítohó Jesucristú chindee ñàha-gá xii-ndo cuendá sá ñã túú nãgá tnúhu quindáá iní-ndó, dico nchaa ñáyiu duca<sup>n</sup> dándahú ñáhá xii-ndo nacháhu-yu núu Yã Ndiõxí nchaa sá quidě-yu cuëi náí-gá ñáyiu cùú-yu.

<sup>11</sup>Te cächí tnúhu-í xii nchòhó ñáyiu ndècu ndihí-í ichi Yã Ndiõxí sá nõu dícó dènehé-ni-í ñáyiu sá cuäha-yu sèñá ñii-yu dàtná ní cachí ndii Moisés ñá, te vã yõo cuu úhú iní ñáhá xii-í ní cùu, te ni vã tũu úhú iní-yu cuendá sá ñí xihí Xítohó Jesucristú núu cùrúxí ní cùu. <sup>12</sup>Te nchaa ñáyiu dàsatú iní ñáhá xii-ndo sã cuäha-ndo sèñá ñii-ndo, te váha-gá sá ná cádá-yu mée-yu ñi<sup>n</sup> tnúndòho, te ñá díú sã dúcá<sup>n</sup> cànuichi ñahá-yu xii-ndo cùndecu-ndo.

<sup>13</sup>Te nchòhó ñáyiu ndècu ndihí-í ichi Xítohó Jesucristú diu-gá ní taunihnu ñaha-gã xii-ndo cuendá sá vã cànchìcú<sup>n</sup> nihnu-gá-ndó nchàa nacuáa ní cáhá<sup>n</sup> ndii Moisés, dico vã cání iní-ndó sã sã dúcá<sup>n</sup> ñí taunihnu ñaha-gã xii-ndo, te cuu-ni cada-ndo nãndi sá cuèhé sá dúhá vèxi iní-ndó, dico cuu iní tnáhá-ndó ñi<sup>n</sup> ñi<sup>n</sup>-ndo te chindee tnàha-ndo. <sup>14</sup>Chi duca<sup>n</sup> cãhá<sup>n</sup> Yã Ndiõxí sá cúú iní-ó cuè tnaha ñáyiu dàtná cúú iní-ó mée-o. Te núu duca<sup>n</sup> na càda-o, te quide-o nchaa nacuáa tàú-xi cada-o dàtná cãhá<sup>n</sup> nchaa tnúhu ní chídó tnùní ndii Moisés. <sup>15</sup>Te núu nchòhó cúú úhú iní tnáhá-ndó ndècu-ndo, te ñá túú quide váha-ndo te núu duca<sup>n</sup> quide-ndo, dico yúhú cächí-í sá vã dúcá<sup>n</sup>-gã cada-ndo cùndecu-ndo cuendá sá vã dácuíta nihnu tnàha-ndo.

**Nàcuáa sàni iní ñáyiu ndècu ichi cuèhé ichi duha ndihí nàcuáa sàni iní ñáyiu ndècu ndihí Espíritú Yã Ndiõxí**

<sup>16</sup>Te na cächí tnúhu-í xii-ndo sã cádá-ndó nchàa nacuáa cuiní mée Espíritú Yã Ndiõxí cada-ndo, te duca<sup>n</sup> te vã cání-gã iní-ndó càda-ndo nãndi nchaa sá cuèhé sá dúhá sàni iní mée-ndó. <sup>17</sup>Chi nchaa xíã<sup>n</sup> ñã túú tnàhá tnúhu-xi ndihí Espíritú Yã Ndiõxí. Te diu-ni duca<sup>n</sup> quide Espíritú Yã Ndiõxí, chi ñã túú tnàhá iní-xi nchaa sá cuèhé sá dúhá sàni iní-ndó. Te sá dúcá<sup>n</sup> ñã túú tnàhá tnúhu tnàha-xi xíã<sup>n</sup> ñã túú ñihí ndéé-ndó càda-ndo ñi<sup>n</sup> sá vãha sàni iní-ndó càda-ndo. <sup>18</sup>Te núu quide-ndo nchaa nacuáa sànu ichi ñaha Espíritú Yã Ndiõxí, te ñã túú-gã táxí tnùní ñáhá nchàa tnúhu ní chídó tnùní ndii Moisés xii-ndo.

<sup>19</sup>Te nchaa ñáyiu xini-yu nchaa nàcuáa quide ñáyiu quide cuèhé quidé dùha. Te duha quidé-yu: Cue tée cãhá<sup>n</sup> ndihí-güedé ñáyiu ñihí te ñã díú ñàdihí-güedé cúú-yu, te diu-ni duca<sup>n</sup> xiquide cue ñáyiu ñihí, te nãndi-gá nchaa sá cuèhé sá dúhá cuähá<sup>n</sup> véxi-yu quidé-yu. <sup>20</sup>Te quide cahnú-yu

nchaa sá cächí-yu cùu ndiòxí te ñá ndàá sá ndiòxí cúú-xí, te quide nduu tnahá-yu, te cùu úhú iní tnáhă-yu, te nàá-yu, te cùu cuiñú tnáhă-yu, te ío yáchí cúdeñ<sup>n</sup>-yu, te ndúcú-yu mee-ni sá cúú-xí mée-yu, te ñá túú cùu ñ<sup>n</sup>nuú-yu cundecú-yu, te quide diñ<sup>n</sup> tnahá-yu. <sup>21</sup>Te cùu cuedú iní-yu nchaa sá ndécú ndìhi dava-gá-yu, te sàhni tnahá-yu, te ío quihú-yu, te ndì cuu ndì cuú-yu quidé-yu nchaa sá cuèhé sá dúhá, te nándi-gá nchaa sá cuèhé sá dúhá quidé-yu. Te sa cächí tnúhu-í xii-ndo sá ncháá ñăyiu duca<sup>n</sup> xíquide vá ndúú tãhũ-yu cundecú-yu núú ndécú Yă Ndiòxí táxí tnùní-gá.

<sup>22</sup>Dico Espíritú Yă Ndiòxí chindèe ñaha-xi xii-o cuu iní tnáhá-ó, te cùdí ìní-ó ndècu-o, te ío váha cùu iní-ó, te cãhnu iní-ó, te váha iní-ó, te cùndahú iní tnáhá-ó, te quide ndáá-ó ndècu-o. <sup>23</sup>Te ndàhú iní-ó, te quide-o nchaa nacuaá tàú-ó càda-o, te nchaa xiã<sup>n</sup> chindèe ñaha Espíritú Yă Ndiòxí quidé-ó, te núu duca<sup>n</sup> quide-o, te vá yõo ñ<sup>n</sup>-gá cáhá<sup>n</sup> sá ñá túú quide váha-o ndècu-o. <sup>24</sup>Te nchoo cuè ñăyiu ndècu ndìhi Xítóhó Jesucristú, sa nàha-o sá ñí xihí-gá núú cùrúxí sá cuendá-ó, núu xiã<sup>n</sup> duu<sup>n</sup> duu<sup>n</sup> ní dáñá-ó nchàa ichi cuehé ichi duha, te ñá túú-gă táxí tnùní ñáhá ñì ñ<sup>n</sup> sá cuèhé sá dúhá sá ñí xóo cani iní-ó ní cùu. <sup>25</sup>Te vitna ní ngúndecu ndìhi-o Espíritú Yă Ndiòxí chindèe ñaha-xi, te xini ñuhu-xi sá cádá-ó nàcuáa sànu ichi ñaha Espíritú-gá cada-o.

<sup>26</sup>Te vá cádá cãhnu-o mee-o, te vá ndúcú-ó plètú, te ni vã cúú cuèdú iní-ó sá ndécú ndìhi tnahã ñăyiu-o.

### Chindee tnàha-o ñ<sup>n</sup> ñ<sup>n</sup>-o

**6** <sup>1</sup>Te nchòhó ñăyiu ndècu ndìhi-í ichi Xítóhó Jesucristú cächí tnúhu-í xii-ndo sá ñuu ñ<sup>n</sup> ñăyiu ndècu ndìhi-ndo ichi-gá ní quidé-yu ñ<sup>n</sup> sá ñá túú tàú-yu cadá-yu núú-gă, te nchòhó ñăyiu quide váha ndècu ndìhi Espíritú Yă Ndiòxí cáhá<sup>n</sup>-ndó dôho cue ñăyiu duca<sup>n</sup> xíquide-á<sup>n</sup> cuendá nucúnu ichí-yu, te vii vii cáhá<sup>n</sup> ndìhi-ndõ-yu, te ío coto-ndo mée-ndo cuendá sá vã cádá-ndó ñ<sup>n</sup> sá ñá túú tàú-ndó càda-ndo núú-gă. <sup>2</sup>Te ío chindee tnàha-ndo, te cuáha tnàha-ndo tnúhu ndee ìní cundecu-ndo cuendá nchaa sá yãha-ndo. Te núu duca<sup>n</sup> na càda-ndo, te quide-ndo nchaa nacuaá ní cáhá<sup>n</sup> Xítóhó Jesucristú cada-o.

<sup>3</sup>Te núu ìó ñ<sup>n</sup>-ndo cächí-ndó sã ño váha quide-ndo ndecu-ndo ichi Yă Ndiòxí te ñá ndàá ñá, te dícó dándahú-ndó mée-ndo sá dúcá<sup>n</sup> quide-ndo. <sup>4</sup>Te ndì díñ<sup>n</sup> ndì díñ<sup>n</sup> càda cuendá-ndó ñuu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudí ìní-ndó sá cúú-xí mée-ndo, te vá cání ìní-ndó sá quidé vãha-gá-ndó dàcúxí dàva-gá-yu. <sup>5</sup>Chi tàú-ó sã ndì díñ<sup>n</sup> ndì díñ<sup>n</sup> càda cuendá-ó nàcuáa ndècu-o.

<sup>6</sup>Te nchaa nchòhó ñăyiu dàcuaha tnúhu Yă Ndiòxí chindee-ndo cuè téè dàcuaha ñaha xii-ndo tnúhu-gá cuãñaha-ndo nãndì sá xíní ñuhu-güedé.



<sup>7</sup>Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yă Ndiöxí, chi nchòhó xìní-ndó sã nõu na càda váha-o cùndecu-o, te cùu-xi ìí<sup>n</sup> sá vãha sá cúú-xí-ó, dico núu vá cáda vãha-o ña, te ío ndoho-o te núu duca<sup>n</sup> na càda-o. <sup>8</sup>Te núu quide-o nchaa sá cuèhé sá dúhá sàni iní-ó, te diu-ni xíã<sup>n</sup> dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espíritú Yă Ndiöxí xii-o, te cundecu ndihi-o Yă Ndiöxí ni caa ni quíhí<sup>n</sup>. <sup>9</sup>Te xini ñuhu-xi vá dãná ndeé-ó càda váha-o cùndecu-o, te duca<sup>n</sup> te sáá nduu càda váha ñaha Yă Ndiöxí xii-o, te núu vá ná tũhú iní-ó càda váha-o cùndecu-o. <sup>10</sup>Te cada-o sã vãha sá cúú-xí nchaa tnaha ñáyiu-o vitna ndecu-o ñuyúú-a, te ío-gá tàú-ó chindee-o cue ñáyiu ndècu ndihi-o ichi Xítóhó Jesucrístú.

### Tnúhu ndéé núú ñí ndihi-ná

<sup>11</sup>Te cundehe-ndo sã ndãa ndãa lètrá tée-í núú tütú-a sá cúú-xí-ndó. <sup>12</sup>Te nchaa ñáyiu quide yicá sá cuãha-ndo sèñá ñii-ndo dàtná ní cachí ndíi Moisés, ñáyiu-á<sup>n</sup> cúũ-yu ñáyiu cuíní cudùu núú tnaha ñáyiu-xi. Te duca<sup>n</sup> quidé-yu cuendá sá vã ndóhõ-yu cuendá nchaa tnúhu sá dánèhé ñáhá sã ñí xíhí Xítóhó Jesucrístú núú cùrúxí. <sup>13</sup>Te ni ñáyiu sa ní ngúndecu ndihi sèñá ñii-xi ñá túú quidé-yu nchaa nàcuáa ní cáhá<sup>n</sup> ndíi Moisés, dico mée-yu cuíní-yu sá cuãha-ndo sèñá ñii-ndo. Te duca<sup>n</sup> quidé-yu chi quide cahnú-yu mée-yu núú nchaa dava-gá ñáyiu. <sup>14</sup>Te yúhú chi ñá túú quide cahnu-í mée-í cuendá nchaa sá quídè-í, chi mee-ni sã ïo cùu váha iní-í sá Xítóhó Jesucrístú ní xíhí-gá núú cùrúxí cuendá-ó. Te diu cuendá sá ñí xíhí-gá ñá túú-gã ndécù-í ichi cuèhé ichi duha, te ni ñà túú-gã táxí tnùní ñáhá ñí ìí<sup>n</sup> sá cuèhé sá dúhá xii-í. <sup>15</sup>Te ñá túú ñã chíndèe ñaha-xi xii-o cuéi na cuãha-o sèñá ñii-o àdi vá cuãha-o, chi ndècu ndihi-o Xítóhó Jesucrístú, te ní nduu-o dàtná ìí<sup>n</sup> ñáyiu saa, te xíã<sup>n</sup> cúú-xí sã ïo-gá xíní ñùhu-xi. <sup>16</sup>Te xicá<sup>n</sup> táhù-í núú Yă Ndiöxí sá ncháá nchòhó ñáyiu quide nchaa nacuáa càhá<sup>n</sup>-í-a cundecu nahi-ndo, nchòhó ñáyiu cùu cuendá Yă Ndiöxí dàtná ñáyiu isràèl chi ñáyiu-á<sup>n</sup> ñí cachí-gá sá cúú cuendá-gá. Te mee-gã ío cundàhú iní ñáhá-gã xii-ndo chindee ñaha-gá.

<sup>17</sup>Te není vitna cuíní-í sá vã yõo ìí<sup>n</sup>-gá chidácá nihnu ñaha xii-í cuendá chùu<sup>n</sup> quide-í, chi yayacá<sup>n</sup> sa ní nduu tílòhó ñii-í cuendá sá ndóhò-í cuendá Xítóhó Jesucrístú.

<sup>18</sup>Te nchòhó ñáyiu ndècu ndihi-í ichi Xítóhó Jesucrístú xicá<sup>n</sup> táhù-í núú-gã sá ïo na chindee ñaha-gá xii-ndo nchaa-ndo. Te duca<sup>n</sup> na cùnduu. Te ío chí cáda ndèe iní-ñã vitna.